



Tir Yimym

www.tiryimym.in

Regd. No. RNI. NAGAAO/ 2004 / 13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :



Tir Yimym



tir_yimym



tir yimym

TAPAK 3

**Gujarat Titans support staff
nung Wade denogo**

**PM Modi-i AIIMS nung VP
Dhankhar semdang**



VOL. XXII ISSUE NO. 145 (ADOK 145)

DIMAPUR

TENTONÜ (MONDAY)

METSÜREMI (MARCH) 10, 2025

₹ 5.00

Nagaland assembly-i Committee tasen 2 tentetogo

Dimapur, March 9, 2025 (TYO): Nagaland Assembly-i climate change aser local governance maparen ketdangsütsü atema luden tasen ana tentetogo.

Luden kati environmental sustainability aser kati Nagaland nung rural & urban local bodies ketdangsüba reprangtsü tentetogo.

"Nagaland Assembly-i nübor tonga sorkar ketdangsüba mapa inyaksü tenangzükba den putepa luden tasen ana tenteter. Asen Assembly züngsemtemi sorkar ketdangsübaren tajungba kümdaktsünür aser iba jagi luden tasen ana ya rongdak nüngdak ta ajiteta tentetogo" ta NLA Speaker Sharingain Longkumer-i ashi.

Committee on Climate Change ajanga environmental challenges atema inyaksü.

Iba luden ajanga climate policies, climate commitments, air & water quality improvements amala mapa ketdangsüa inyaksü.

Parnokisa green budgeting, electric vehicle adoption, aser eco-friendly agricultural practices nungittsü.

Külen, Committee on Urban Local Bodies & Nagaland Village Councils ajanga decentralization aser local governance tashi itdaksüba mapa inyaksü.

Iba luden ajanga waste management, water supply, housing for the underprivileged, traffic regulation, aser urban & rural areas nung pollution control mapa ketdangsüa inyaksü.

Item luden züngsemtemi bendanga agüja inyaksü aser parnoki Honibar (March 8, 2025) nungi parnok lemozükba mapa tenzükogo ta NLA Speaker-isa ashi.

Speaker Sharingain Longkumer-isa 2025-2026 kümsük atema panel of chairpersons den külemi financial aser non-financial committees 14 tentetba metetdaksüogo.

Northeast nung mapang tatsütiba mapa inyaker

New Delhi, March 9, 2025 (Agencies): India nung mapa inyakba ya nisung aika atema kanga dang anibelemer ama bilemer saka reports ajangabo balaka ashir.

India nung anogo ka nung nisung kati minute 422 (ghonda 7 shi) dang mapa inyaker ta report nung shia lir.

State shia mapa inyakba asadangra Northeastern region nung mapang tatsütiba mapa inyaker aser Assam nung "working hours" tatsütiba lir.

Assam nung nisung kati ghonda 5.87 dang mapa inyaker aser iba ya Goa (ghonda 5. 5) dang nungi tera agi teimba lir ta Economic Advisory Council to the PM ajanga ashi.

India nung anogo nung mapang talangtiba mapa inyakbaji Daman & Diu nung minute 668, Dadra & Nagar Haveli nung minute 608 aser Delhi nung minute 496 lir.

Northeast kübok state 8 nung

"working days" kanga tatsü lir ta Dr. Shamika Ravi indang analysis ajanga ashir.

Delhi nung nisung kati anogo ka nung ghonda 8.3 mapa inyaker saka Assam nungbo ghonda 5.87 dang inyaker.

Assam sülen Meghalaya, Nagaland, Manipur, Mizoram, Arunachal Pradesh, Tripura, aser Sikkim lir. Northeast state tem den kasaji Goa, Andaman & Nicobar Islands, aser Bihar nung lir.

Rural areas nung mapa inyakba asadangba nung Nagaland nung minute 343 dang aser Assam nunga minute 348 dang inyakba bushitetogo.

Urban areas nung Manipur nung anogo ka nung minute 363, Meghalaya nung minute 375 aser Assam nung minute 381 dang inyakba bushitetogo.

Linük den medemdangra Northeast state tem nung "work-day" tatsüba lir aser iba tesem nungsa anogo-a tatsüba lir.

CUET PG exam 2025 admit cards agütsür

New Delhi, March 9, 2025 (Agencies): National Testing Agency (NTA)-i Common University Entrance Test (CUET) Postgraduate (PG) 2025 atema admit cards agütsüogo.

Candidate temi NTA indang official website exams.nta.ac.in. nung admit cards agizüksü akok.

CUET (PG) tatidang ya March 13 nungi April 1, 2025 tashi Computer-Based Test

(CBT) mode nung agütsü. Minute 90 tatidang ya shifts 3 agütsü aser subject 157 atema lir.

CUET PG 2025 question paper ya English aser Hindi nung angütsü.

CUET ya Ministry of Education aser UGC ajanga agir aser iba tatidang ya central universities aser tanga rejutem nung postgraduate programs admission atema lir.

Nagaland sorkari Food Processing Industries policy sayaogo



March 8, 2025 NLA budget session tembangba anogo nung agiba noksa ka angur.

Kohima, March 9, 2025 (TYO): Nagaland sorkari food processing sector tejaklen odaktsütsü atema Food Processing Industries Policy aka sayaogo.

State Assembly session nung

Chief Minister Neiphiu Rio-i iba policy tasen benoka liasü aser iba ajanga entrepreneurs, farmers, aser investors yariba den technical assistance aser infrastructure development nung temulung agütsütsü.

Tanur tasembuba asor nem Rs 50,000; Tebur asor nem nashi agütsütsü

Amaravati, March 9, 2025 (Agencies): Andhra Pradesh Chief Minister aser TDP President Chandrababu Naidu-i tanur aika asotsü ajungmesoba mapang ka nung MP kati tanur tasembuba asoba tetsür shia nem Rs 50,000 agütsütsü nangzükogo.

Vizianagaram Kalisetti nungi TDP MP Appala Naidu-i iba tenangzükba metetdaksüogo aser paisa tebur asoba tetsür nem nashi ka agütsütsü ta nangzük.

Lok Sabha MP Naidu-i iba sempet ya pa indang itasen nungi agütsütsü ta ashi.

Appa Naidu-i iba sangdong agütsüba ya social media nung kanga prokshir. TDP lennirtem aser züngsemtemi parnok social media accounts nung iba

osang prokshir.

Chief Minister Naidu-ia MP Appa Naidu nem tenüngsang agütsüogo.

Honibarnü Rajiv Sports compound, Vizianagaram nung International Women's Day sentong nung jembidang MP Naidu-i osang metetdaksü.

Chief Minister Naidu-i tan ita Delhi semdangdang South India nung nütsüng yongsük ajema akümba tebilemtsü lemsatapa liasü.

Uttar Pradesh aser Bihar ama state tem nungbo lanur aika lir ta pai ashi.

"Ni family planning atema jembia arur. Tang ni iba tangatetba melenshir aser nütsüng yongsük teimba akümtsü ajungshir. India nung

Iba policy ajanga local food products atema food safety, quality aser export nung yariteptsü.

Food Processing Industries Policy ajanga mapa adokdaksütsü aser infrastructure renloksü. Iba nung collection centers, processing centres, pack house & cold chains, warehousing facilities amala dena lir.

Food processing wadang nung incubation centers, food testing labs, aser skill development maparen inyakba nunga iba policy ajanga nungittsü.

Iba policy ajanga lanurtem, SHGs, tetsürtem aser rural entrepreneurs ajungmesoba den food processing technologies nung research & development ajungkettsü sentong lir.

nütsüng yongsük melenshira rongsenketzung nung tajangzük kanga angutsü. India aser India nunger tarutsü atema kanga tajung asütsü kechiyong alimai India nunger nübo dak imlar" ta Chandrababu Naidu-i ashi.

Honibarnü CM Chandrababu-i tetsür mapa inyaker temi tanur aso shia maternity leave agütsütsü metetdaksüogo.

"Tesüba nung maternity leave ya tanur ana asotsü atema dang agütsü saka tangbo tanur kwika sodir soaka maternity leave agütsütsü. Iba ya kibong nung nütsüng renloka aotsü ajungmesotsü atema lir. Onoki Andhra Pradesh nung tetsürtem tashi itdaksütsü aser tarutsü tajung yangertsü tenangzükba nung inyaker" ta CM Naidu-isa ashi.

Parliamentary Affairs Minister Kenye-i sorkar ketdangsürtem ayongzük

Kohima, March 9, 2025 (TYO): Parliamentary Affairs Minister K.G. Kenye-i budget session nung MLA tem aser sorkar ketdangsürtem indang tongti shilem nenshia metetdaksü.

Assembly nung Rule-55 kübok Minister Kenye-i jembidang Legislature dang "Temple of Democracy" ta ajar aser iba nung policy tem atonger aser state yimsü asütsü atema ozüng ama akümer ta ashi.

Sorkar ketdangsürtemi item policy mapa küma inyaksü tebilemtsü khuret abener aser public timi tenzüksü atema Legislature den amalitepa inyaksangshir ta pai ashi.

"Iba atema Legislature indang Assembly Secretariat aser sorkar indang Civil Secretariat külemi yaritepa aotsü nüngdaker. Iba

amalitep nung yariteptsü atema Nagaland nung Assembly Committee tongti 16 tashi tenteta lir aser iba nung Public Accounts Committee, Estimates Committee, Committee on Public Undertakings dena lir" ta Kenye-i ashi.

Item committee ajanga sorkar mapa jungjunga repranger aser legislative policy nung aliba ama terenlok mapatem inyaka aotsü len tuyua repranger. Ajisüaka, committee züngsemtemi sendentem nung madenba ajanga tebilemtsü ajurur, ta pai ashi.

Committee sendentem nung medentetba züngsemtemi mapang magütsütetra sodi agütsüla ta Minister Kenye-i ashi.

Paisa Administrative Heads of Departments (AHOds) aser Heads of Departments (HoDs)-i

tongtipang Assembly onüktem atema senden ayongdang madenba atema khuret abenba lemsatap.

"Ketdangsürtemi Oral Evidence Meetings nung madenba ajanga senden athitsüsa akümer aser iba ajanga tetsükdaktsü ajurur. Talisa tongti ketdangsürtemi parnok kübok inyakba ketdangsürtem senden nung adeni yokba ya tim masü" ta Minister Kenye-isa ashi.

Parliamentary Affairs Minister-isa sorkar ketdangsürtem dang legislative maparen akhümtsübuttsü aser Assembly ajanga benokba onüktem nendaka inyaksü ayongzük.

MLA temibo nübertem tenzüksü temulungtetba nung noktaka lir ta paisa ashi.

Mkg. nung tetsürtem anogo sentong ayongzüka agi



Mokokchung Municipal Council Conference Hall nung International Women's Day sentong agir kelen Nagaland State Cooperative Bank ajanga loan for agiz kertem aser MMC Councillors-tem külemi tangokba noksa.

Mokokchung, Metsüremi/ March 09 (TYO):Alima ajunga den külemi Mokokchung nunga March 08 nü International Women's Day sentong Mokokchung Municipal(MMC) aser Nagaland State Cooperative Bank semtepa "Accelerate Action" ta asüba omen nung ajemdaker agi aser ano iba den repsema kasa sentong nungsa tetsürtemi luyimba balala aser bank inyakyim balala ajanga tajangzük agia takum aser kibong mesüa litettsü asoshi shisatokden ka akaogo.

Alima ajunga tetsürtem anogo nüngtem o Mokokchung Municipal Council Deputy Chairperson Wb.Lanuakum-i jembidang alima otsütemji reprangdangra tesem balala nung tetsürtem mezügmeshiba lir,saka Naga lima nungbo tetsür tebur mebendanger aser kasa dang alirta ashi.

Paisa alima nung temelenshi adokdaksütsü asoshi tetsürtemi mapa tuluka inyaktettsü,anungji ojala nungertemi asen lokti koda

ajungketa yanglutsü ibaji asoshi ano maneni shishia bilemdaktsüner, iba jagi ano tetsür tebur tsüingda tebandang aliba nunga temelenshi adoktsüta adenshia aliba tetsürtem ajungshi jembi.

Mokokchung Municipal Council Deputy Chairperson-isa tanu Mokokchung sünep sünepa aliba ya nenok tetsürtem, tetsütemi kibong aser lokti ajungtsü asoshi inyakba ajanga lirta adenshia aliba tets rtem dang tepelaba lemsatepa ashi.

Sentong nungsa "Investing to Transform" ta asüba onük nung shisatokden agiba mapang District Horticulture Officer, Mokokchung Dr.Temjenmenla ajanga aonsotsü lu ayimba,naro lu ayimba,konger anepaluba, aonsotsü aser süngjanglijang shizüka modaktsüi anepaluba item ajanga tajangzük anuba indang lemsatep aser ano Board of Director,NStCB Imtiyapang MMC Councillor aser Branch Manager NStCB

Mokokchung Temsülepden Imchen tenatia Cooperative Bank ajanga tetsürtem tia tajungba yanglushitsü asoshi teyari agütsüba indang lemsatepa liasü.

Nagaland State Cooperative Bank ajanga Alima ajunga tetsürtem anogo nüngtem tetsür 20 nem NStCB ajanga teyari lon agütsütsü asoshi loan form agüja liasü.

Sentong nung Maongtula Councillor MMC ajanga tepela o jembi aser Penli Watsü telen tezülula ajanga sarasadema sentong tenzükba den Wt.Imtinenla Councillor MMC ketdangsüba nung sentong agoa liasü.

Mokokchung Municipal Council Conference Hall nung iba sentong agidang Watsü Mungdang nungi,Ward 18 Watsü Telen nungi,Gorkha-tsür tentet nungi,Lotha-tsür tentet nungi,Sema-tsür tentet nungi aser Eastern Women tentet nungi shim tajung agi iba sentong kanga dang meraketa agia liasü.

1st Quarterly National Lok Adalat nung ken o 291 bentet

Dimapur, Metsüremi/March 09 (TYO): Honibarnü 1st Quarterly National Lok Adalat alidang ken o 427 aliba nungi 291 benteta tembangtsüogo.

Nagaland State Legal Services Authorities (NSLSA) tawabangba kübok district court telungzük nung District Legal Services Authorities (DLSAs) ajanga sitting benches 11 amenoka liasü.

Iba anogo sen 3,87,35,490 indang ken o benteta liasü. Ken o ya timba pre-litigation aser pending stage nung alirtem liasü aser yangji bank recovery ken o, loan, telephone bills aser MACT ken o tem liasü.

Judicial officer ka presiding officer ama aser advocates tem conciliators ama telok anaprong den lenchie oa jembitepa ken o tem tangatetep nung tembanga liasü.

Longleng District Legal Service Authority ajanga bank recovery ken o trok benoka jembi, koba sen 153,185 indang liasü aser ken o jak benteta liasü.

Longleng nung Chief Judicial Magistrate cum Secretary LDLSA Kumdilong Kessen (NJS) ya presiding officer liasü aser SBI bank staff, Retainer Lawyer Adv. Mane Phom aser Panel Lawyer Panglang Y Phom nunger conciliator liasü.

Mokokchung nunga 1st Quarterly National Lok Adalat sentong ya District Court Complex nung ayongzüka Julian Sitlhou, Chief Judicial Magistrate (CJM) cum Secretary, Mokokchung DLSA leisüba nung agi, aser conciliators ama Retainer Lawyer Watitemjen aser Mokokchung DLSA nungi Panel Lawyer tem liasü.

Mokokchung nung bank recoveryken o 19 benoka jembi ajak takok ngua benteta sen 15,05,340 indang ken o tembanga liasü.

Wokha nunga iba sentong ya Cheliam Khiamniungan, JMFC/Secretary, Wokha DLSA lenisüba kübok agia liasü, kong conciliators ya Panel Lawyers Jacob Kikon, Shanchobeni P Lotha nunger liasü. Wokha nung pre-litigation bank recovery ken o 11 benoka jembi bentettsü, koba sen 16,40,839 indang ken o liasü.

Zunheboto DLSA ajanga District Court Complex nung 1st Quarterly National Lok Adalat ta Honibarnü ayongzük, kong District & Sessions Judge cum Chairman ZDLSA Phuleto Yephtho, NJS ya presiding officer liasü aser

conciliators ya Easter H Yephthomi aser Inolito K Sumi liasü. Parnoki ajak senteper pre-litigation bank recovery ken o pongu benoka jembi sen 33,24,719 jenjang ken o ana benteta liasü.

Phek nunga 1st Quarterly National Lok Adalat ya Tucuno Vamuzo, NJS, District & Session Judge cum Chairperson Phek DLSA lenisüba kübok agi aser conciliator ama Sekhotso Rokha, Panel Lawyer Phek DLSA liasü.

Parnoki NStCB (Phek, Pfutsero aser Chozuba) indang pre-litigation bank recovery ken o 29 benoka sen 22,90,243 jenjang ken o tetem kema bentettsü.

Kohima nung kasa sentong ya CJM cum Secretary, Kohima DLSA Wokono Yhoshii NJS lenisüba kübok agi, kong Panel Lawyers Kohima DLSA ya conciliators liasü.

Parnoki pre-litigation Bank recovery cases 504, Telephone bill recovery cases 250, pending MS cases asem aser MACT cases ana benoka jembi liasü. Iba mapang Telephone bill recovery cases pongu, Bank recovery (pre-litigation) cases 35 tatem kumja liasü.

Parnoki sen 67,40,888 indang ken o jembi sen 46,51,504 indang ken o bentettsü, kong Banks 15 aser telephone office ana nungi shilem agia liasü.

Dimapur District Legal Services Authority janga 1st Quarterly National Lok Adalat ya District Court Complex nung agia N. Longshithung Ezung, PD&S Judge and Chairman, Dimapur DLSA ajanga tenzüktsü.

Dimapur nung National Lok Adalat nung presiding officers ya N. Longshithung Ezung aser Seyielenuo Mezhi, CJM & Secretary, DDLSA liasü aser ken o 116 benokba nungi 64 benteta liasü, koba sen 1,44,08,989 jenjang liasü.

Kiphire DLSA ajanga sen 31,65,604 jenjang ken o bentettsü, Mon DLSA ajanga sen 52,14,775 jenjang ken o 31 bentetja liasü.

Kasa anogo Tuensang DLSA ajanga bank recovery cases 33 benoka jembi sen 4,51,853 jenjang ken o 7 benteta liasü.

Maneni Peren nunga State Bank of India, Jalukie nung 1st Quarterly National Lok Adalat ya March 8, 2025 nü ayo0ngzüka pre-litigation cases 110 benoka jembi aser sen 19,15,239 jenjang ken o 67 benteta liasü.

NITI ajanga Dimapur nung Career Guidance sentong ayongzük

Dimapur, Metsüremi/ March 09 (TYO): NITI (NEET-JEE) Academy ya STEM (Science, Technology, Engineering, Mathematics) atema premier institute ka lir, aser batch tasenba March 10, 2025 nü tenzüktsü lir.

Parnoki NEET aser JEE ama competitive exams atema tematiba jenjang nung coaching agütsütsü nükjidong nung sentong ka March 8, 2025 nü NITI Auditorium, Dimapur nung ayongzüka liasü.

Sentong nung adener pela agizükba o jembidang NITI Nagaland indang Managing Director, Ajay

Sethi-i Artificial General Intelligence (AGI) indang lemsatepa liasü.

Sethi-i kaketshir aser tsürabortem dang education loans agitsü tsüboa malitsü ayongzük aser education tajung nung sen indokba ajanga tajangzük tali angutsü, ta ashi.

Pai lanurtem dang anisüngzüka aliba yutsür tayongzükba balala ajanga pei mangdang bushitsü ajungshia liasü.

Sentong nung JEE 2016 state topper aser Youth Icon of Nagaland, Er. Rishav Sethi-i school azüngba mapang nungi Delhi Technological

University nung azüngba aser Nagaland asoshi mapa tajung inyakba lemsatepa liasü.

Technology tsütsü pai tesüsa shilem tajung agiba ya Hornbill Mobile App aser NBSE Connect App nungertem ya lir.

Rishav Sethi-i NEET & JEE coaching agiba tajangzük indang lemsatepa liasü aser internet tashi amshitsü ayongzük.

Iba sentong tenzükba Dr. Alem Sangtam, president, Christian Forum ajanga sarasadem, kong NITI tesayur Ujala Dey menden liasü aser IITian Jaydeep Pandit-i melepzüng o jembi liasü.

SPONSORED BY: Office of the SECRETARY, GOVT. OF INDIA, NEW DELHI

MINISTRY OF TEXTILES

VIRASAT

75th Anniversary

ORGANISED BY: NAGALAND HANDLOOM & HANDICRAFTS DEVELOPMENT CORPORATION LTD. (A Govt. of Nagaland Undertaking)

My Handloom My Pride

WELCOME TO

State Handloom Expo (SHE)

HATHKARGHA MELA

Under Aatmnirbhar Bharat Utsav

At Urban Haat Dimapur, Nagaland

DATE : 06TH TO 19TH MARCH, 2025

TIME : 10:30 AM TO 5:30 PM

Kaketshir lokti tentet 7-i Jantar Mantar nung longkak aittsü



New Delhi, Metsüremi/ March 9 (Agencies): 'India Alliance Student Organisations' kübok kaketshir lokti tentet 7-i Jantar Mantar, Delhi nung March 24 nü longkak aittsü sentong aliba sandongogo.

Parnok takhangbatem rongnung, paper leaks asüba, university elections agitsüba, National Education Policy (NEP) 2020 agintsüba aser faculty and academic staff appointment aser promotion dak sendakba nung University Grants Commission (UGC) draft nung densema lir.

Kaketshir lokti tentettem rongnung National Students Union of India (NSUI), All India Students Association (AISA), Students Federation

of India (SFI), All India Students Federation (AISF), Muslim Students Federation (MSF), Samajwadi Chhatra Sabha, aser Chhatra Rashtriya Janata Dal (CRJD) nung densema lir.

Parnoki 'India Alliance Students Organisations' tawabangba kübok linük nung tesem balala nung March 17 nungi 22 tashi nung longkak aitba sentong aser press conferences balala ayongzüka agiba sülen linük yimtiba nung March 24 nü longkak aitba sentong ka agitsü sentong yangluogo.

Iba dak sendakba nung Union education minister Dharmendra Pradhan-i ashiba agi, UGC draft norms tasenba

ajanga state university tem nem parnok indang faculty shimtsü asoshi tashi tali agütsütsü. Opposition lenirtemi iba jenjang agiba ya aitsüogo aser ashiba agi, inyakyim tasenba yagi state university tem nung vice chancellor shimba inyakyim nung state sorkar tashi ajema kümdaktsür.

Iba kaketshir lokti tentet yagisa, longkak aiba sentong nung educationists, taoba UGC mendenbuba, Indian National Developmental Inclusive Alliance (INDIA) kübok political party tem nungi lenirtem, tesayur lokti tentettem aser linük kübok tesem balala nungi kaketshirtemi shilem agitsü, ta metetdaksüogo.

India-i Belfast & Manchester nung consulate semzükogo



New Delhi, Metsüremi/ March 9 (Agencies): Northern Ireland kübok Belfast aser Britain kübok Manchester nung India indang consulate ana external affairs minister S Jaishankar-i semzüksüogo. Pai ashiba agi, iba ajanga linük ana den shishilembaba tsütsü aser nüburtem tsüngda tesendaktep tajungba akümtsü.

Honibarnü UK nung India indang consulate pezübuba semzüksüba mapang Jaishankar-i ashiba agi, taoba mapang inyakatoker alitsüba mapa kar India-i tang inyakdar, kechiyong New Delhi-i Britain nung consulate ka lapoker küm 40 jungogo. London nung high commission dak alia Edinburgh aser Birmingham nunga India indang consulate amenoka lir.

Linük ana tsüngda tesendaktep akangshitsü nükjidong nung consulate amenokogo, koba free trade

agreement (FTA) atema benoker aliba tembanga jembishinüba sülen tali tajungba akümtsü imlar.

Toba ita India aser UK na FTA atema sensaksem tenzükogo. Iba sensaksem ya 2022 küm January ita tenzük aser UK nung taoba küm tentetba Labour Party sorkari ashiba agi, parnoki taoba Conservative Party sorkari tenzüka toktsüba ya parnoki asadangshiner.

Jaishankar-i ashiba agi, Manchester temeket nung aliba tesemtem den India shishilemba ya pound million 700 alang lir aser iba tesem nung India nung firm 300 dak tema lir. Paisa, tang benoker aliba FTA ya shishilemba aser investment kija atema masü, kechiyong iba ajanga bilateral tesendaktepa kanga tashi taitba akümtsü, ta ashi.

Jaishankar-i British deputy

prime minister Angela Rayner den Manchester nung ajurutepa, bilateral tesendaktep aser shishilembaba jenjang ajungkettsü aser nüburtem tsüngda tesendaktep tajungba küma yanglushitsü asoshi sensaksema liasü.

Kasa mapang nung Jaishankar-i, Northern Ireland yimtiba Belfast nung India indang consulate lapokja liasü. Pai ashiba agi, iba ajanga India nung nem teyari agütsütsü aser iba den trade, technology, business aser education amala lenla nung tesendaktep asoshi lenmang lapoktsütsü.

Jaishankar-i Northern Ireland indang deputy first minister Emma Little-Pengelly aser junior minister Aisling Reilly na den Belfast nung ajurutepa, skills, cyber, tech, creative industries aser manufacturing amala nung tesendaktep akangshitsü sensaksema liasü.

Menungra Bilemteter



ASO :
29-12-1963

ASÜ :
10-03-2024

Asür C. Asangla Jamir (Chuchuyimlang)

Pungmang ka ama dang bilemer, saka teti asoshi tepila Salem shir asangsang nung tanü küm ka abensaago.

Aji saka asenok lia aruba anogotem aser nü temeim tabensa shisatsü aser mapa tajung onok mulungjang nungi kodanga mepilar.

Na mebilemiang anogo ka danga maor, tanü na onok den meliaka onoki iba anogo na menungraseta sarasadema amonger.

Temeim Kinungbo, Jabaso, Jalatem, Semchir aser Kinungertem.

PM Modi-i AIIMS nung VP Dhankhar semdang

New Delhi, Metsüremi/ March 9 (Agencies): Ato Kilonser Narendra Modi-i Deobarnü sangdong ka ajanga, Vice President Jagdeep Dhankhar temang manemi aliba atema shisabulua bilemba lemsatepogo aser ashiba agi, pai All India Institute of Medical Sciences (AIIMS) nung Jagdeep semdanga pa koma ali aji asadangogo.

X nung post ka ajanga PM Modi-i ashiba agi, "AIIMS-i oa Vice President Shri Jagdeep Dhankhar temang koma ali aji asadangogo. Pa takaratiba nung taneptsü angutsü sarasadema atar."

Rajya Sabha chairman Jagdeep Dhankhar ya Deobar anepdang linük yimtiba nung All India Institute of Medical Sciences nung cardiac department-i anir oa admit süa liasü.

Arishi küm 73 tain VP teku nung tashiba ka ajangshiba aser minprongba sülen mozükidangi anir oa liasü. Ajisüaka pa temang tamajungba masü ta shiogo.

PTI sangdong ka ajanga ashiba agi, Dhankhar ya AIIMS nung Head of the Department of Cardiology Rajiv Narang kübok Critical Care Unit (CCU) nung admit süa liasü.

Taoba hopta Dhankhar-i pa kinungtsü den Rajasthan kübok Jhunjhunu tesem nung Mahatma Gandhi government school semdang, kong parnok state indang Social Justice and Empowerment Minister Avinash Gehlot, MLA Rajendra Bhamboo aser Vikram Singh Jakhal aser tanga ketdangsürtemi agizüka liasü.

Sangasi yimtsüng nung amendaka aliba school nung ya pai pa tetsü asür Kesari Devi tenüng nung 'Ek Ped Maa Ke Naam' campaign kübok süngtong ka temja liasü.

Paisa, kaketshirtem aser faculty züngsemtem dena sensaksema liasü.

Jagdeep Dhankhar-i kaketshirtem dang shinga nema parnok inyakyim manishidaktsütsü aser tamakok angutsü atema tsübua malitsü ajungshia liasü.

MK Stalin lenisüba nung DMK MP tem senden amen

Metsüremi/March 9, 2025 (Agencies): Tamil Nadu chief minister MK Stalin lenisüba nung Deobarnü Dravida Munnetra Kazhagam (DMK) MP tem senden ka menogo. Senden nung delimitation aser National Education Policy indang sensak asem aser iba ajanga kongshiba state tem anidener iba anema nokdaktsü bangjema liasü.

DMK MP temisa opposition INDIA bloc aser tanga democratic tashitem den longjemer delimitation dak sendakba nung Tamil Nadu temeden rakzüker meyoxtsü atema nokdaktsü mulungtepa laisü.

"Tanü DMK MP tem senden nung onoki Tamil Nadu indang parliamentary representation kümzüka ayutsü atema longjemer nokdaktsü bangjemogo. Nütsüngyongsük kanga junga azüokba merenshitsü merangba nokdangtsü atema iba ajanga kongshiba state tem nungi party

tem anidentsü. Delimitation dak sendakba nung onok temeden rakzüker meyoxtsü atema INDIA bloc & democratic tashitem den longjemer inyaktsü," ta Stalin-i X nung zülutsü.

MP temisa Hindi oshi benoktsü merangba aser National Education Policy (NEP) anemba den Tamil Nadu nem parnok tangutsü tim senotsü teyari agütsütsü takhangba agütsüogo, ta Stalin-i ashi.

Delimitation ya 2026 küm benoka inyaktsü lir aser Stalin-i ashiba agi, iba ajanga Tamil Nadu amala state tem tashi ajema kümdaktsütsü kong nütsüngyongsü azüoktsü asoshi kanga takok ngua jenjang agiogo.

Iba hopta tetenzüklen pai chief minister tenet dangi shiti zülua, delimitation inyakyim ya federalism anema aser nütsüngyongsük kanga junga azüokteter aliba sate tem merenshitsü asoshi lir, ta ashi.



TIR YIMYIM YIMOBILEM (EDITORIAL)

DIMAPUR MONDAY, MARCH (METSÜREMI) 10, 2025

Osangbener nem sempet ka !

Nagaland nunga osangbenertemi pei lima aser nübortem nem osangtsüsang metetdaksüba dang masü saka shisalen tajung sayua aniba mapatem reprangteta yakanü alima ajunga nung Tetsürtem Anogomung amungba sentong nung, Nagaland State Commission for Women (NSCW)-i Nagaland Page yimozülur Wt. Monalisa Changkija nem NSCW Excellence Award 2025 agütsüba ya osangbenertemi yongyaa ataba anogo aser mapa ka atalokba asütsü. Nagaland Page ya Nagalamnd nung anogo shia adokba osangkakettem rongnung mezünpur liasü saka taküm küm nungibo madok anenogo. Ashi, iba osang kakat maneni adoka alidang iba ama sempet ya la nem agütsü asübo, ano ajisa tazüba süla ta bilemer. Ajsüaka, osangkaket adokba anenyonga lai osangbener mapa nungibo manen, kechiyong tanga lai osangkakettem nung lai angatetba aser bilemba indang zülur. Aji oda, kechi mapa nung südirsüaka nisung ka nem mapa tajung asoshi tenüngsang agütsütsüba yabo temenu maka, anungji la taküm lia agütsüabajia sür agütsüba dang nungibo kanga agia tajungba, iba jagi la dang masü saka Nagaland nung osangbenertem ajak tani-tebelem ajak amaa pelar. Naga nunger oshi nung osangkaket adokba indang bushidangra, 1932 küm Aor kakatshirtemi Ao Milen adok aser küm 58 sülen English oshi nung anogo shia adokba osangkaket Nagaland Post 1990 küm adok. Iba sülen tanü tashi nungbo Nagaland nung anogo shia adokba osang kakat maneni adokya alibaji English osangkaket 3, Ao ana, Tenydie ka, Sumi ka, aser Nagamese nung ka ta adoker. Atangji, tanü putu yabo ano electronic photo asünungji, akhidang nungi adoka aruba kakat nung menünger azünga osangkakettem dang masü saka local tv aser YouTube channel ajanga yokba osangtema aika kümogo. Item ajakji nübortem saksalemdakja metetdaksüba, angatetdaksüba aser lokti aser alima tajungba kuma aotsü atema shisalemsatepba sabangtem lir, anungji osangbenertem yagi akhi putu nung ariju nungertemi inyakba mapatem to aika benzüka inyaker. Atangji, osangbenertem mapa ya ayongayonga inyakba jangratemtsü mapa kabo masü saka tejangraba aser tangatetba agi timtem, nüngsen aser tetsübu ajak tizükteta inyakba mapa lir. Aji oda, osangbenertem asoshi anogo tajung-majung, tzunglu aru, anü apu, kinunger pi, aonung anüngdang kecha mali, ajakji parnok asoshibo kasasa tongtibang lir. Parnok jagi shitak zülura amokmeren aser nüngsen ajurur aser meshitak zülura maksü ajurur, anungji tenüngsang anguba anogobo mali. Ano, Nagaland nung balaka, Naga lima nung osang kakat adok tenzüker küm 90 dak tali süiaka Nagaland government-i osangbenertem rongnung küm kakabo tajunger karbo shimteta Independence mesüra Republic Day ama anogo nung sempet agütsüba osang kangabo mangashii aruogo. Ashiko, Nagaland nungang tenüngsang sempet agütsü langa osangbener malitsüa akok, saka osangbenertem rongnung nübortem ajangzükdaksütsü asoshi government-i meshitak inyakbatem tuteta zülur alinungbo, ano iba ama osangbener mapatem reprangteta sempet agütsüra, iba jagi alima tajungba akümtsü aser nübortem tali ajangzüktsü. Aiben government-i tenüngsang sempet agütsüba ya government nung asanger mesüra government nung alirtemi mulungba ama inyakertem nemang agüja alitsüa akok, mesüra tiak sanga meshirtem nemang agüja alitsü akok. Kasaji, tanü India nunga tenüngsang sempet agütsüba ya 'business' tajung ka kuma inyakba teloktem aika lir. Item jagi mashi nisung ka dang tenla meshitsü aser pa mesüra la nem linük nung nübortem asoshi mapa tajungtiba inyaksang aser inyakla ta naroküm agüja yimjak nung sempet ajaki meteta sempet agütsür aser asenok aikati aji aginer. Ajsüaka, sempet yabo alitsüa makok mesüra kü nema kua ta meshitsüa makok, tenüngsang agütsüba sempet yabo meshiba agi masü reprangteta agütsütsüla. Iba jagi sempet akhüm aser jenjangji atutsü aser tagizüker asoshia nümadangtsü mapa ka asütsü aser tangartema pei pei mapa nung sempet agizükertem amaji meranga inyaksü ajungshitsü. Hau, state government temaba menden nungi mesüaka, tetsürtem teloki danga osangbener tetsürtem rongnung mapa jeta inyaker ka reprangteta tenüngsang sempet agütsüabajia osangbener ajaki pelashishia agizüker.

OLEMSABANG

ALUASER SHISHIDAK REVIVAL AJANGA TEMELENSHI - MATHI 13:44-46

~ Wati Longchar (Eralibill)

(Yashi adok nungi...)

Asenoki mapa aika inyak nung takok mangutsü, saka ibai ajanga nubur tejekleni anitsü ta asüba tenyaba mapa ka tenzüker nung ajungtsü aser Naga lima alimai meteta akümtsü. Tanü Naga nunger, India nung naser lokti rangben taküm nung temelenshi adokdaksütsükobala tenyaba mapa ka Ao Mungdangi anir inyaksü? Tanü lokti jenjang reprangdangra yimtsüng nung alir jendoka lir. Parnok renlok daksüba mission inyaksütongtibang ta ajiteter. Tetezüyimsüng structure yanglushiba den aluyimba (farming mission, scientific farming) nüngdak. Naga nunger tangar dak chiyungtsü asoshi metaloker ali nungbo majungtsü. Tanü asenok aosu Assam nung yua aliba nungi nüchiso nüngdak. Jang, alo, mertsü, dal, süngjanglijang, süngolio, shi, entsü aser ango asen sasa peria madoktet tashi lokti maintsü. Yamaji züsentettsü Tsüngremi ali temo talubosa moaja lir. Nuburtem mapa ngua, rongsenren renloka aküm nung dang lokti tajungba kuma yanglushitsü aser Governmenti ibala asoshi yariteptsü lemanng aika lir. Sensaker lima nung lokti temenen ajak pokteter ta metetdi.

Lokti Yanglushitsü Mera

Shishilemba dak revival adokdakjang ta asüba nungji, mezüngbuba meraji Nagaland ya "land of opportunity" kümdaksütsüla. Tanü Naga lanur asoshi Nagaland ya "Land of NO opportunity" (tzümar nem dang opportunity agütsünuba lima) ta ashitsü akok. America aser China takatiba lima ta züngshir. Item lima nungji tantsür-tambur, temang-mokokmenir kar dak alaka lanur mapa maka mangutsü. America aser China lima nung bendangera, tazünger aser mazünger pei yari mapa jendi lir, aser mapang mashika nung mapa anguteter. "America is a land of opportunity", "China is a land of production" ta züngshir. Production orientated, market oriented mapangren balala Governmenti anir, arogoi anir, takar aser tazünger ajaki inyak nungbo Naga lima yaa land of opportunity akümtettsü. Lanurtemi inyaksü (work force) agütsütettsü, saka parnok aikati anir opportunity create sutsütsü asoshi experience, temulungtetba aser rongsen mali takok aiben mangur.

Nagaland state ngur küm 60 tema, saka menungdakba Government mapa balala create asüba dak alaka, lanur atema employment "opportunity" meyanglutsür. Government tashi maitba agi "Government over-employed" tashitak agi tonga lir. Nagaland nung rongsen reloka kümdaksütsü industry kwi lir? Lanur tazünger aika mapa ngutettsüsa, asen lima koba dang "golden tringle" - China, India, Myanmar, Bangladesh ajak shishilemba ajurutepdak lima nung Govt.i kechi inyakteta ali. Koba Govt. aser shiba CM alidang lanurtem atema "Land of opportunity" sudaksütsü ta nukjidong yur inyaka arua lir? Hornbill festival? Failed. Tanü Governmenti short-term scheme-orientated mapa ajanga election nung meyangnem shishilembatepba aser goonda ishika amshia yimsü sutepba yayim yagi lokti nung teraksa dang tali bener arutsütsü. Tang aliba inyakyim short-term scheme-oriented government yagi nuburtem sorkar dak metalokter ochimashi mapa balala inyaka alitsüba lokti kadang yanglutettsü. Nuburtem jenjang tajungba nung ajungketnera long-term production-scheme nukla nung mapa tenzüksüla. Tanü Nagaland ya "failed state" ta shitettsüsa corruption agi sunga lir. Kasa jenjang nung arogoa lir. Rongsen renlok daksüba maparen (production initiative) tenzüker nung dang alima renloktsü aser nubur tejekleni aotsü. Iba nungi arogo shilem kar ta metetdi.

Tatem nung ano nenshia ashir: Tangari inyakteter Aori/Naga nungeri meinyaktettsü na? Inyaktettsü. Ashiko asenok dak tajungba inyaktettsü sempet aser tashi lir. Tsüngremi ali-temo, tsüngküm, mopung tajung moaja lir. Anungji nukla tulu aser tajung yur Aori/Naga nungertenemtsünglen alua prokshia lira aser pei akokba aluyimba mapa tasen inyaktetra, Naganunger dang masü India aser asen meküta aliba countrytem nübur ajunga jenjang tajungbaajungkettsü. Tarutsü lanur asoshi mapa aika generate sütettsü aser Kanan lima ama akümtsü. Pei sasa züsenteta achiba aser inyakba nung temulung agüja inyakra Naga lima ya takarakümtsü aser lokti tejanleni aotsü. Alu aser shishidak revival adoktsüba mission mapa inyaksü ayongzüker.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agütsü mepishir

Ceasefire sülen West Bank nung Khristanpur tali tim atemer

Jerusalem, Metsüremi/ March 09 (Agencies): Hopta trok tejakdang Israel aser Hamas tsüngta ceasefire tenzükba sülen West Bank nung Khristanpur tali timtemer, talisa security aser senzüsempongba nung tenokdangba agütsüba ajanga lir, ta yangji alirtemi ashir.

Iba tesem nung Catholic youth chaplain, Father Louis Salman-i Aid to the Church in Need (ACN) dang, "Onok asoshibo West Bank nung ceasefire ajanga tensa tamajungba ang kumogo," ta ashir.

Ceasefire tezüngzüktep nung Israel-i Palestine nunger tepuokdak alirtem chioktsü mulungtep, aser item ya aika Gaza-i masü saka West Bank-i

ang meyipa shilang, aser iba yongji Israel-i region nung security checkpoints tali amenok.

Latin Patriarchate of Jerusalem indang CEO Sami El-Yousef-i ashiba agi, Israel-i West Bank nung ali tali rakzüker aser refugee jenti ainshidaktsür.

"West Bank nung ali tali agiba aser Jenin nung refugee camp tem nungi nisung 16,000 shi ainshidaktsüba den ki o jen rongdoktsüba onoki nguogo, anungji parnok taolen maka," ta pai ashir.

"Tang West Bank nung gates 185 aser checkpoints 900 dak tema lir, saka tang Gaza nung atalokba ajanga alimai memeteter."

Timtem liaka iba tesem nung

Catholic arogo ya küm ka ser tesadang dang nungi tashi taitba jenjang nung lir, kechiaser parnok dak maneni nüburtem tenzüktsü tashi lir, ta El-Yousef-i ashir.

Ibai talisa alima tesem balala nung aliba arogo temi yariba ajanga lir, ta pai ashir.

Yihuda aser Muslim nungeri amokbanger aliba region nung Khristanpur alitsü tongtipang lir, ta Father Salman-i ashir.

"Yisu asodang nungi Khristanpur ama pa alidak, pa asüdak aser pa tanaben shia arudak asenok alitsü asen teinyaktsü lir," ta pai ashir.

Pope Francis-a shiranga liaka paia Gaza nung aliba Catholic nunger asoshi teti bilemtsür.

Pakistan nung tetsür ka tashiyim amshia yimsü melendaktsü

Islamabad, Metsüremi/ March 09 (Agencies): Pakistan nung Khrista dak amanger tanur tetsü ka tashiyim agi Islam dangi meyipdaktsü aser kibong akum ama tiazü kuli nung meyongnem agütsüdaktsüba sülen jena oa lar kinunger den tanaben ajurutepogo.

Christian Post ajanga ashiba agi, iba tetsürla university ka nung mürekmejuba mapa inyaker aser kasa reju nung security guard Muhammad Asif Sadiq-i külakoktsü.

La senotsü teyari angutsü lenmang bushitepba nung yarir ama Sadiq-i la mejangjaba tesem kati anir ao aser yanghi la tamangba yimsü melenba aser kibong akumba kuli tiazü

shia alidak meyongnem agütsüdaktsü.

"Ni pa tebilemba memetet aser pai yaritsü ashiba nung ni tamang aka," ta lai ashir.

Anogo ti tashi pua yur yangji aliba putu yimsüsür tem tetsüing ajemokba sülen la chiok.

Ajisüaka February 14 nü Sadiq den nisung ana arua prangbong agi tuitar la pua bener ao aser mejangjaba tesem ka nung asemnü merenshia amshi.

February 17 nü maongka ka ngua la jena arua lar kibong den tanaben lungjema liasü.

"Ni kanga aoksakanger liasü, saka kü kinungbo aser tanurtem tanaben angutsü teimla ajanga jena aotsü tashi angu," ta lai ashir.

La kinungbo Asif Masih-i police nem osang agütsü, saka ketdangsür temi tasü ita mera magiba yong Sadiw ya pre-arrest bail ngua liasü.

"Ketdangsür nem süpokrem agütsütsü onok dak tashi mali, anungji pa anema süoki ia bilema mera agitsü mebilem," ta Masih-i ashir.

Khristan lawyer Sumera Shafique teyari nung tetsürla statement court nung agütsüogo aser medical examination agiba nung la dak züka merenshiba jangjatet.

Open Doors ajanga alima nung Khristanpur alitsü linük tamajungtiba 50 asadangba 2025 World Watch List nung Pakistan ya jenjang ti buba nung lir.

Tsüngrem dak amangba ajanga takum kumzükbakuli lemsatep

Madison, Metsüremi/ March 09 (Agencies): Wisconsin nung aliba Abundant Life Christian School nung injang khashishidang kanga sashia yiruba arishi küm 14 tain tebur ka kinungeri pa takum kumzükbakuli asoshi doctor tem tenüng asang aser parnoki Tsüngrem dak amangba lemsatepa liasü.

December 16, 2024 nü arishi küm 15 tain Natalie Rupnow-i school nung injang khalokja tesayur ka aser kaketshir ka khaseter la sasa la takum agia liasü.

Iba mapang kaketshir trok yiru, aser River densema kaketshir ana kanga sashia yiru.

Iba school nung first-year teacher, Christina Clardy-i iba lendong mapang kaketshirtem kumzüka liasü aser tesülen lar

jabaso samaba metet.

Tesülen police temi lar jabaso River ya kanga sashia yirur American Family Children's Hospital nung anir oa lir ta jangjatsü.

WMTV den sensaksemba mapang River tetsü Christina Clardy-i ashiba agi, par jabaso River ya mela-mela atsüngzüka maoba tanur ka lir. Pa meranga inyaker tanur ka lir.

"Pa temang nung taneptsü anguba aser onoki tepang agi rasaa meshitetba mapang Tsüngremi mapa tulu inyak ta onoki amanger," ta ashir.

Pediatric trauma care nung medical director Dr. Adam Brinkman-i ashiba agi, tesüiba küm pongu mesüra trok tsüngta iba tanur indang mozü kidangi shirangertem temang anepalutsü aruba rongnung River ya

tamajungtiba yirur liasü.

River ya surgery pongu agi aser intensive care nung hopta ana amung. Pa temang tajungba akumba ngua doctor temi pa mesotsü tenzük.

Anogo 46 mozüki nung munger River ya kidangi meyipa yokogo.

Pa mozüki nungi ayazüka aodang mozüki nung inyakertemi teka malokja River nem akhum agüja liasü.

"Asen takum nung tajung asoshi pelar ta ashitsü tongtipang. Aser onok alidak ama asen meketa nisung tajung alirtem nem tenüngsang agütsütsü tim," ta Christina-i ashir.

"Pa takum kumzüktsü meimlaba mapanga ni ajangshiogo. Saka Tsüngrem nem tenüngsang agütsür," ta lai ashir.

ANOGO ABEN TSÜNGREM DEN

Zion Leni Aoba (T.Ken 48:1-14)

Hezekiai Sennacherib akokba osang angashir iba takok benjung amongtsü asoshi Yihuda nunger ajak Yirusalemi ao (2 Chuba 18,19). Tanü Khristantem Kotaker Zion sensotem lir aser aini aor (Ibri 12:18-28).

Ainlen aor ama, asenoki Zion indang jembir. Tsüngrem shibai Zion ulua yanglu aser Pai kümzükbakuli indang asenoki jembir. Asenoki Zion tobur ajungba indang jembir. Tanelaren, Zionji alima ajunga tepela lir (Lipok 12:1-3).

Ainlen aor ka ama, asenoki Zion angur (t. 4,8). Asenoki Yirusalem repranger aser asenoksasa tasü aiter. Assyria nunger den raratsü Hezekia lemang kecha mali, saka pa Kibuba kaa liasü. Pai Assyria nungeri ataa züluba shiti Kibuba matsüngdang sala aser pa nem toktsü. Tsüngremi agizük. Assyria nunger yimtimi amaktsü tezü nung liasü, saka parnok sümang aser jena ao (t. 5). Kodang asenok Tsüngremi mulungba nung lidir asenok kümzüka alir.

Aini aor ka ama, asenok Zioni aier (t. 9-11). Yihuda nungeri mezüngbuba tekülemdaki ai. Otzü shisadangtsü asoshi ibai junger. Na kodang tenla kidang lidir, ni amanger nai Tsüngrem temeim indang aser alima tatem tashi pa tushitsü shisadanger ta ni amanger (t.10). Alima den lemsateptsü asoshi asenok takok tuluba kar: asen Kibuba Yisu asenok asoshi asü aser tanaben shia aru.

Ainlen jajar ka ama, asenoki Zion meketa jajar (t.12-14). Ibai takok anguba tetushi agüja yimdong süa jajaba lir. Kodang Nehemiahi jara meshitet choir telok anati jara meketa jaja aser ajurutep (Neh 12:27-47). Na kechi aka aser Tsüngremi na asoshi kechi inyak tarutsü putu dang junger ta nai ashitsü. Tia maka Israel nunger tamang kaket mali asü (Ayatai 2:15). Asenoki temoatsütemji teti asoshi ta magizüktsü kümdangdi.

Na kotaker Zion leni odar. Tasü itang, kechiaser na Tsüngremer tawabangba kübok lir. Arogo takümi na Zion leni odar ta kuli sayudang. Na asoshi Pai kechi inyak iba asoshi Pa tushiang.

Zion Sensotem (T.Ken 48:1-8)

Israel nungeri teti Yirusalem asoshi asüküma bilema liasü: "Tobur tajung aser jangratemtsü Zion tenemji alima ajak tepela, chuba yimti tenem talang anüdoklentip nung lir" (t. 2). Iba indang rasaa ashiba tanü ajakibo magizüktettsü akok, talisa yimti aser kin tsütsü nungi. Saka yangi ken züluri kotaker Zion Tenem indang jembir ta bilemer. Ibri 12 nung Khristantemji Zion senso pur ta ashir.

Tsüngrem Yirusalem nung alir. Zion agitsü asoshi army koda aru ken züluri ashir. Saka kodang parnoki iba yimli tulu angu, parnok tetsübu nung jena ao. "Kechiaser ajiang chubatem külemi sentep aser ibaji anema atu. Kodang parnoki aji angu, parnoki süngmang, aser tetsübu agi parnok jena ao. Parnok dak tetsübu aser tatenten agi atong" (t.4,5,6). Armyi Yirusalem nung kechi angu? Mezüngbuba parnoki Tsüngrem uluba angu. "Kibubaji tulu lir, aser asen Tsüngrem yimti temeshi tenem nung lir" (t.1).

Tanabuba, Tsüngremji pa nübur jenokdak ta parnoki angatet. "Yangji aliba chuba yimti nungji, Tsüngrem parnok jenokdak asütsü ta pai sayuogo" (t.3). Tsüngremji chuba ka dang masü; shiba dangi orr asen tebilemstü aser nüngdak ajak ashitsü akoker aji Pa lir. Tsüngremi Zion Tenem yangluba ama pai asenok yanglutsü. Kechiba nai tejashi ajurur ta, nai süngmangtsü akok. Tsüngremi na yanglur aser kümzüker. Anungji na tsübu shisa bulu alitsü menügdak.

Tsüngremi Yirusalemji yanglu, yimti meküta Pa uluba kuli liasü. Yamaji na Kotaker Zion senso lir, aser pa iba nung alir. Ne jenokdak ama, Tsüngremi na kümzüker aser ne nüngdak agütsür. Pai na anepaludakjang aser yanglujang.

AO OSHI ANGAZÜKDAK:**TANÜ ANGAZÜKTSÜBA OJANG****Tekurem**

(adj) tangar dang tai metokteti temulung nung tejashi ayuba (bitterness felt at heart)

* Tekurem mulungjang adenba nisung pelaa malir.

Tekütsü

(b) temang shilem nung teben teloktep (elbow)

* Asayadang tangari kü dak tekütsü agi aset.



Tir Yimyim

OLONG PAITEP # 7086

1			2			3			4	
			5		6		7			
8										
			9							
	10									
								11		12
			13				14			
15						16				

TIPIEN

1. Anenzükak ki
3. Asür mangyimba
5. Temulung nung shisadang
8. T ____ lu
10. Takdang temalen
11. Tesa ____ a
13. Ajungbena temulungjang
15. Tejen lai nung tesayur
16. Tsüngsak-mopung

-(5)

-(5)

-(5)

-(3)

-(9)

-(3)

-(5)

-(5)

-(5)

LANGTSÜNGLEN

1. Reprangdaksü
2. ____ ur
4. Kiojen yangludak
6. ____ ait
7. Nagaland nung ayong ka
9. Küm kasa purtem
10. Tetsüng tajemtdak
12. ____ adenshi
14. Tsünüsenbongtsü adokdak

-(4)

-(3)

-(6)

-(7)

-(5)

-(5)

-(6)

-(4)

-(3)

OLONG PAITEP # 7085 TELANGZÜBA**TIPIEN :**

1. Kasa, 6. Rangben, 7. Mait,
9. Poktet, 11. Ati, 13. Atasa, 16. Rür,
17. Rajang, 20. Lanu, 24. Nüngjem,
25. Süra.

LANGTSÜNGLEN :

1. Khu, 2. Süjak, 3. Onük,
4. Oba, 5. Anü, 6. Ratet,
7. Mozü, 8. Ita, 10. Tar, 12. Tinu,
14. Salem, 15. Aja, 18. Anünü,
19. Taju, 21. Ano, 22. Onü, 23. Kua.

NAI-A YA METETTER MA

Arishi küm 108 tain Shitsui Hakoishi-i "world's oldest female barber" indang Guinness World Records certificate amer agiba noksa angü. March 5, 2025 nü Tochigi Prefecture, Japan kübok Tochigi Prefecture nung lar kou mejepba dokan nung kulikaket agüja liasü.

Shitsui Hakoishi ya November 10, 1916 nü aso aser la arishi küm 14 asüadang kou mejeper ka akümtsü telemtetba agia liasü. Lai küm 90 tashi kou mejeba arur.

Khristantemi Arunachal Freedom of Religion Act anema lungkak ait

Itanagar anasa Borum nung Arunachal Christian Forum (ACF) lenisüba kübok Khristantem adenshir ADFRA anema lungkak aйдang agiba noksa ka angur.

Guwahati, March 9, 2025

(Agencies): Arunachal Pradesh nung Arunachal Christian Forum (ACF) kübok Khristantemi Brihostibarnü lungkak aitba sentong tulu ka agiogo.

Parnoki Arunachal Pradesh Freedom of Religion Act (APFRA), 1978 anema noktaker.

ACF-i secretariat kima nung lungkak aittsü sentong renema liasü saka Itanagar Capital Region administration-i temelaba magütsü.

Brihostibarnü 8th Legislative Assembly indang 4th session nung Yachuli MLA Toko

Tatung-i APFRA atema private member resolution ka benokba magizük.

Tatung-i benokba private member resolution ajanga 2019 nung anti-PRC riots mesüka law & order khuretttem ajurutsü akok ta shia Assembly-i magizük.

"Onoki Act anema noktaker aser rules meyiapa agitsüba masü saka Act indang jembitsü" ta ACF secretary-general James Tech Tara-i ashi.

"Onoki democratic movement tanabuba shilem tenzütsü aser sorkar inyakyim repranga atatsü" ta Tara-isa ashi.

"Denominations balala nungi Christians lakh 2 tema Itanagar anasa Borum nung adenshia liasü" at ACF president Tarh Miri-i ashi.

APFRA, 1978 ajanga Arunachal Pradesh nung Khristantem dak kongshitsü aser alenbangtsü ta ACF-i ashir.

March 3, 2025 OSD to the Home Minister Mama Natung-i ACF dena sendaktepa alir ajak APFRA indang draft rules lemsateptsü atema jatepa liasü.

Ajisüaka, ACF-i rules masü saka Act atema noktaksü anungji tezüluba nung Act meyanglushitsü agüjang ta takhangba agütsü.

Manipur nung Kuki-Zo tesemtem mokdang lungkak ait

Imphal, March 9, 2025

(Agencies): Kuki-Zo Council (KZC)-i Honibar ayaterm nungi Kuki-Zo nunger tesemtem nung mapang tatakzük kecha makai mokdangtsü ayongzüka liasü aser iba ajanga Deobarnü Manipur nung tetsükdaksü ajuruogo.

Sorkari National Highways nung "free movement" tenzüka anema KZC-i lungkak aiter.

Manipur kübok tenemlenn aser talisa Kuki-Zo nunger

teimba ser aliba tesemtem nung mokdang kanga sashia liasü. Ajisüaka valley districts nungbo mekongshi.

Lungkak aiteremi essential services dak alaka ajunga noktang aser Kuki-Zo tetsür volunteers-i tongtipang tesemtem nung mendanga ata.

Parnoki mokdangba lenmangtem nung Kangpokpi District Headquarters kübok National Highway 102 dena lir.

Kuki-Zo nunger teimba ser

aliba Kangpokpi, Churachandpur, aser Tengenoupal district tem nung shishilembabaren maliasü.

Iba mokdang kübok medical services, religious activities, aser media medendaksü saka parnok senzusenbongtsü atema kulikaket meshia reprang.

Manipur sorkar ketdangtsüba nungi tashi balaka agüjang ta takhangba agüja tetsür lungkak aiteremi Gamgiphai aser district headquarters mokdanga liasü.

CM Sarma-i Amit Shah semdangtsüba maparen reprangshi

Guwahati, March 9, 2025

(Agencies): Union Home Minister Amit Shah-i taruba hopta Assam semdangtsü aliba atema Chief Minister Himanta Biswa Sarma-i maparen reprangshimogo.

Amit Shah-i Jorhat district kübok Dergaon nung police academy yanglushiba lapoktsütsü ta Chief Minister's Office (CMO)-i sangdong ka nung ashi.

Union Minister Amit Shah-i state semdangtsü atema maparen CM Sarma-i reprangshimogo ta parnokisa ashi.

Amit Shah-i Assam kanga junga semdangtsü aser Dergaon nung Lachit Barphukan Police Academy tasen yanglushiba lapoktsü maparen Sarma-i reprangshima liasü. Amit Shah-i March 14 nü Assam

semdangtsü.

March 15 nung Shah-i Mizoram nung sentong ka nung adentsü aser kasa nikongdang Asam-i meyiapa arur tasüngji Bodoland Territorial Region (BTR) nung senden ka amentsü.

Koch-Rajbongshi nungeri ST jenjang meshir:

Külen, Koch-Rajbongshi nungeri Amit Shah arutsü jakdang Scheduled Tribe (ST) jenjang meshia takhangba agütsüogo.

March 8 nü Koch-Rajbongshi Sanmilita Joutha Mancha lennirtemi Assam Assam unit president Dilip Saikia nem memorandum ka agütsüogo.

Ibanung ST jenjang meshiba, otsüsütsü Kamatapur State asentenshitsü aser armed forces nung Chilarai Regiment

tentettsü onüktem dena lir.

Koch-Rajbongshi nunger ya western Assam aser northern West Bengal nung kin tulutem rongnung ka lir.

Küm aika ST jenjang meshia arur Adivasi, Ahom, Chutia, Matak, aser Moran nunger den parnok dena lir. Parnok ya tang OBCs nung densema lir aser parnoki ashiba agi ST jenjang angung dang education, employment, aser political representation nung maongka tajungba angütsü.

Mancha-i BJP dang April 30, 2025 tashi nung Centre aser state sorkartem den senden amentsüsa mapa inyaksü ayongzüko. Iba amaji meinyakra parnoki 2026 Assembly elections jakdang lungkak aittsü ta amokmerenogo.

MENUNGRA BILEMTETER

Asür ojala Suponglemla (Chuchuyimlang)
10th March 2024 - 10th March 2025



Temeim Oja, nai onok toktsür orr tanü küm ka abensa arudang onoki ne temeim sarasadem nüktzü kodanga amatsü makoker, nai toktsür aoba chirnurtem aser semchirtemi na bilemteta sarasadema amonger.

~ Temeim Kinungertem.

US-i mesüshia nuclear ken o mejembitsü: Ayatollah Ali Khamenei



Dubai, Metsüremi/March 09 (Agencies): US Tir Donald Trump-i Iran linük ketdangsür dang nuclear ken o jembishinütsü ajungshia shiti ka yokogo ta shir anogo ka lir Iran indang Supreme Leader Ayatollah Ali Khamenei-i iba ken o jembitsü asoshi Iran memesüshitsüla, ta Honibarnü ashi.

Fox Business den sensaksemba mapang, "Iran amshitsü lenmang ana lir: mitkar tsütsü nungi, mesüra nuclear nok-nü bendenba nungi Tehran nokdangtsü asoshi tezüngzüktep yanglutsüla," ta Trump shia liasü.

Iran ketdangsürtem den senden ka amendang, Washington nükjidong ya par-i imlaba ama inyaksü liasü," ta Khamenei-i ashi.

"Dangar mesüshiba sorkar kari ken o jembitsü ajungshiba ya mangatettep bentettsü atema masü... Parnok asoshi jembiba nungya takhangba tasen lir, ibai Iran nuclear ken o kisüng indang masü... Parnoki imlaba Iran-i khenyongi magizüksü," ta Khamenei-i Trump tenüng metetshie ashi.

Khamenei-i jembiba langzüa White House National Security Council odongtar Brian Hughes-ia ano Trump-i ashiba ojang ajak nenshia shia liasü.

"Iran Regime-i tetsübo dang nungi nübur aser parnok tejangraba mezüng südaksütsü imlar," ta Hughes-i sangdong ka nung ashi.

Tehran den tezüngzüktep ka yanglutsü mulunga aliba lemsatepdang Trump-i pa US tir ama mezüng kümsük inyakdang Iran senzüka yutsütsü asoshi inyakba ama

tanga inyaktar.

Pa 2017-2021 kümsük mapang Iran aser tashi tulu aliba linüktem tsüngta Tehran nuclear maparen ajemtsü tenokdangba agüja züngzüktepba nungi United States anizüker ao.

2018 küm Trump-i iba tezüngzüktep nungi US anien tenodangba tanaben agütsüba sülen Iran-i item tatakzük alema nuclear mapa inyak tenzük.

Tehran-i uranium enrichment mapa ya 'weapon-grade' atongtsüsa maneni inyaker, anungji Iran inyakyim nung tenokdangba tasen agütsütsü mapang tatemleni arur, ta UN nuclear watchdog tekolak Rafael Grossi-i ashi.

Tehran-i par nuclear mapa ya yimjung maparen atema kisüng lir ta ashir.

Ajisüaka Iran indang tongtipang policy tem nung tatem o shidang agütsüsang Khamenei-ibo mesüshir aser tashiyim amshir anema nokdaksü danga lenmang mali ta ashi.

"Parnoki takhangba tasen bener arur aser Iran-i khenyongi magizüktettsü, aser yangji asen defence tashi, missile range aser international jenjang nung asen sentsü dena lir," ta pai ashi.

Tehran-i par ballistic missile sentong ya defensive atema kisüng lir ta shiaka West nungibo rara agi sünger aliba Middle East tali loksatsür ama ajiteter.

US aser Israel den tensa tamajungba akumdang Tehran-i mezügbuba drone carriers aser underground naval base densema nok-nü tasen bendenlokba sangdonga lir.

Ceasefire atema Israel-i team ka Qatar-i yoktsü

Tel Aviv, Metsüremi/March 9 (Agencies): Hamas den ceasefire atema nangzükteper aliba atsülangshitsü atema Qatar yimtibai team ka yoktsü ta Israel-i shiogo.

Honibar aonung Ato Kilonser Benjamin Netanyahu-i ashiba agi, sensaksemtsü atema Israel-i team ka Hombarnü Doha-i yoktsü.

Ceasefire tanabuba shilem atema sensaksemtsü asoshi Hamas lenirtem telok kati Egypt nung ketdangsürtem den Honibarnü Cairo nung ajuruteperba sülen tang Israel-i iba osang ya metetdaksüogo.

Hamas otongdar Abdel Latif al-Qanoua-i anogo ka tejakdang ashiba agi, sensaksem tanabuba shilem tenzükshitsü atema inyakyimtem shitak benoka

inyakba sayudar.

Ceasefire atema nangzükteperba mezügbuba shilem hopta trok March 1 nü tembangogo. Iba mapang Gaza nung pua yua aliba Israel nung 25 aser Israel kübok tepuokdak balala nung yua aliba Palestine nung 1,800 melentepa liasü.

Israel-i, parnoki mezügbuba shilem ya April tom tashi atsülangner ta shiogo aser tanabuba shilem asoshi sensaksemtsü memulungi arudar. Tanabuba shilem nung rara teti atema tembangtsü aser Israel nung sepaitem Gaza nungi ainshitsüba densema lir.

Kasa mapang nung Hamas teloki, nangzükteper aliba ama sensaksem tanabuba shilem tenzükner.

Gaza nung maneni pua yua aliba Israel nung kinungertemi sorkar dang sensaksem tanabuba shilem tenzükshitsü aser ojang dang raratsü ayongzükogo.

Honibarnü nikongtsütsü Tel Aviv nung longkak aiba mapang Gaza nung pua alisang Matan Zangauker tetsü Einav Zangauker-i, tepuokertem amshia yimden yimsüsüba tsütsü ajangzüktsü merangba atema Netanyahu aitsüogo.

Sensaksem agia aliba mapang Israel-i maneni Gaza nung tesem balala makdar aser Honibarnü Palestine nung asem tepsetogo.

Maneni Israel-i tenokdangba agütsür aliba ajanga Gaza nung aliba Palestine nungertem kanga timtemtepdar.

Syria tiri yimjung atema ayongzük

Damascus, Metsüremi/March 9 (Agencies): Syria indang interim tir Ahmed al-Sharaa-i yimjung atema ayongzükogo. Linük tzükümlen mangatettep adoka civilian noklang aika tepsetba sülen pai iba tayongzükba agütsüogo.

Deobar anepdang al-Sharaa-i, linük nung telongjem aser yimjung nüngdaka lemsatep. Paisa, "asenok külemi litettsü," ta ashi. Sorkar tasenba aser taoba tir Bashar al-Assad pusemtertem tsüngda raratepba mapang pai iba tayongzüba agütsügo

Assad pusemertemi Brehostibarnü sentong kanga junga yanglur sorkar sepaitem amakba sülen raratep tenzüka liasü. Sepaitem amakba sülen mang ayangtsü atema Syria nung sorkar tasenba pusemertem meyrejang aikati security forces pusemtsü atema tzüküm nung aliba tesemtemi oa liasü.

UK nung amendaker aliba war monitor Syrian Observatory for Human Rights-i ashiba agi, Brehostibarnü nungi tenzüka Latakia aser Tartous nung Alawite civilians 745 tepsetogo aser sorkar security forces züngsema 125 süogo.

Iba den bendenloksema Assad pusemer 148 tepsetogo ta Observatory-i shisem. Ajak



Syria tir menden nungi atsüngdoker alisang Bashar al-Assad bhukumer tem den khatepdang tepsetba sepai züngsem pezü den asüpila sentong Honibarnü Idlib province nung agidang tangokba noksa nung angur. Syria nung telok ana tsüngta ananü raradang asür nisung 1,000 dak tema kumogo, ta rara asadangba teloki ashi.

senteper asür 1,018 jungogo.

Al-Sharaa-i, shirnoki civilians tem dak rangloker jenjang agidir parnoki iba khuret abentsü, ta shiogo.

Deobarnü Syria indang state meyong news agency SANA-i ashiba agi, Tartous tezülen Betannita yimtsüng temeket nung telok ana tsüngda maneni raratepdar.

Linük yimtiba Damascus nungi Al Jazeera osangbener Resul Serdar-i ashiba agi, raratepba tajemba küma aoba mapang taoba anogo pezü tsüngda kechi atalok aji tejangjaba kümdar.

Serdar-isa, al-Sharaa-i linük

ya ka küma longjemmer yimsü asütsü ta shiaka tawa mangatettep adokba ajanga Syria ya koda lemdanger lir aji sayur, ta ashi.

Deobarnü Deraa aser Damascus governorates na sendaktepba optical cable raksa aser iba ajanga Deraa aser Sweida nung governorates nung telecommunications aser internet services makai aküm, ta Director of Deraa Telecom indang Branch-i ashi. Telecommunications infrastructure maneni amakba ajanga iba ya ataloka liasü, ta Ahmad al-Hariri-i ashi.

Ukraine anüdoklen Russia-i amakdang nisung 14 asü

Kyiv, Metsüremi/March 09 (Agencies): Ukraine anüdoklen region nung yakonung Russia-i amakdang nisung 14 asü.

Ukraine indang emergency service ajanga Honibarnü ashiba agi, Russian sepaitemi Hokulbar aonung Donetsk region anüdoklen Dobropillia jila amakdang nisung 11 tepset aser 30 yirutsü.

Iba mapang storey pongu atongtepa süa aliba ki ti, administrative building ka aser gari 30 raksatsü, ta emergency service ajanga ashi.

Kasa mapang north tsütsü

Kharkiv region nunga Russia-i drone amshia Bogodukhiv nung civilian building ka amakdang nisung asem tepset aser tenet yiru, ta Kharkiv governor Oleh Synehubov-i Telegram nung zülutsü.

Odesa nung drone ka amshia amakdang kitsük-kirong lendong adoka tesem aika nung timtem ajurua liasü.

Honibarnü Leningrad region governor Alexander Drozdenko-i ashiba agi, Ukraine nung drone ka khazükba tsüka Kirishi refinery nung tank ka raksa.

EU foreign policy chief

Kaja Kallas-i item tatalokba aitsü aser iba yagi Putin-i yimjung jangra maliba sayur, ta ashi. "Asenoki mitkar teyari agütsüba asendenshitsüla," ta lai ashi.

Kasaji Poland Ato Kilonser Donald Tusk-ia Russia aitsü aser, "Bomb talila, tashiyim talila, asü-amar talila. Ukraine asoshi ano tesasatsü aonung," ta X nung zülutsü.

Ukraine Tir Volodymyr Zelenskyy-i yimjung asoshi United States den teka amteper inyaker ta jembiba mapang Hokulbar aonung Russia-i amakba ya ataloker alitsü.

NSL: Barak FC-i goal 3-1 agi Frontier Warriors kokogo



Dimapur, Metsüremi/March 9 (TYO): Tang asaya aliba Nagaland Super League nung Barak Football Club aser Frontier Warriors na asaya Barak puri goal 3-1 agi kokogo.

Iba asaya nung Barak nungi asayar Toka-i kanga junga asaya-a pai penalty ana idaktsüba densema goal asem idakja hat-trick ka idaktsü.

Asaya nung Frontier Warriors puria kanga meranga asaya aser mapang kar nungbo parnoki asaya amokbanger asaya liasü. Ajisüaka aibelen kar menaba aser maongka tajung kar magitetba ajanga parnok

kanga akoksa liasü.

Asaya nung parnok rongnungi Dangmei-i minute 53buba nung goal ka idaktsü, ajisüaka Toka-i minute 84buba nung goal tasembuba idaktsüba sülen parnok atema goal küptoktsü asoshi timla makai aküm.

Asaya nung Hat-trick idaktsüsang Toka nem iba asaya atema man of the match naroküm agütsü. Asaya nung pai kanga süngjema minute 4' aser 45+1' nung penalty ana idaktsü aser iba den asaya tatemi tasembuba goal-a kanga junga idakja liasü.

Iba asaya akokba sülen

Barak FC pur league nung temaba jenjang nung jenjang kanga junga yanglushiogo aser kasa mapang nung Frontier Warriors pur playoff nung asayatsü atema parnok finishing aser defensive discipline tajungba küma yanglushitsü nüngdaka lir.

March 12 nü asayatem:

Barak Football Club vs 27th United Football Club - March 12, 5:00 PM @ Chümoukedima Football Stadium

Frontier Warriors vs. Sechu Zubza Football Club - March 12, 4:00 PM @ IG Stadium, Kohima.

Indian Wells: Gauff aser Sabalenka na tasembuba round-i iogo

Metsüremi/March 9, 2025

(Agencies): Australian Open sülen world number three Coco Gauff-i Honibarnü mezüngbuba asaya kokogo. Indian Wells tanabuba round nung lai Japan tsür Moyuka Uchijima 6-4, 3-6, 7-6 (7/4) agi koka liasü.

Asaya nung 2023 US Open champion Gauff-i double faults 21 mena aser iba den unforced errors-a aika mena saka lai tatem nung asaya koktetogo.

Laisa ashiba agi, lai tajungba asayatet asü nung jungla saka Qatar aser Dubai nung WTA asayamung nung mezüngbuba round nung tsükba sülen tang asaya junga mekoktetaka kecha mashishir ta ashi.

La tasembuba round nung Greece tsür Maria Sakkari den asayatsü, shibai 6-0, 6-3 agi Bulgaria tsür Viktoriya Tomova koka liasü.

Tetsür kija asaya nungsa Belarus tsür Aryna Sabalenka-

ia Honibarnü tanabuba round nung McCartney Kessler 7-6, 6-3 agi kokogo.

Iba asaya akokba sülen la tasembuba round nung Italy tsür Lucia Bronzetti den Hombarü asayaba angutsü.

Ajisüaka kasa asayamung tebur kija asaya nung Novak Djokovic Honibarnü tanabuba round nung tsükogo.

Pa Botic van de Zandschulp-i 6-2 3-6 6-1 agi koka liasü.

Arishi küm 37 tain Djokovic, shiba Australian Open semi-final nung Alexander Zverev den asayaba mapang hamstring yirur anena liasü, pa iba asayamung nungbo kecha timtem meli-i asayaba nguogo.

"Court nung yamai dang asayatetdang tezü atanger, ajisüaka kü opponent nem tenüsang agütsür. Kü atema office nung anogo tamajung ka dang asütsü südi," ta Djokovic-i ashi.

Gujarat Titans support staff nung Wade denogo



March 9 (Agencies): 2025 Indian Premier League tenzüksü anogo ishika dang anunga lia Gujarat Titans puri taoba mapang Australia nung wicketkeeper Matthew Wade club indang assistant coach asütsü shimogo.

Wade ya asaya aliba mapang Indian Premier League nunga Gujarat Titans nungi 2022 aser 2024 küm asayaago, ajisüaka pa international cricket asaya nungi anenba sülen IPL mega auction nung mezüngoksemi liasü.

"Champion. Fighter. Tang onok indang Assistant Coach! Matthew Wade! GT Dugout-i tanaben pelashishia agizüker," ta Gujarat Titans-i X nung zülutsü.

Wade IPL nung 15 ben asayar lir aser asaya 15 nungi 12 bo GT nungi asayaba lir. Hardik Pandya lenisüba nung Gujarat Titans puri 2022 küm IPL akokba mapang Wade-a team nung densema liasü.

Wade ya Gujarat Titans coaching team nung züngsem ka

Ashish Nehra, batting coach Parthiv Patel, aser assistant coach Aashish Kapoor aser Narender Negi nung den longjemtsü.

2025 Indian Premier League nung Gujarat team Shubman Gill lenisüba nung asayatsü, shiba tawa kanga junga asaya arudar.

Gujarat pur taküm mezüngbuba asaya March 25 nü Narendra Modi Stadium, Ahmedabad nung Punjab Kings den asayatsü.

Gujarat Titans team:

Shubman Gill, Anuj Rawat, Jos Buttler, Kumar Kushagra, Sherfane Rutherford, Sai Sudharsan, M Shahrukh Khan, Karim Janat, Mahipal Lomror, Glenn Phillips, Rashid Khan, Nishant Sindhu, Manav Suthar, Rahul Tewatia, Washington Sundar, Gerald Coetzee, Gurnoor Brar, Kulwant Khejroliya, Mohammed Siraj, Prasidh Krishna, Kagiso Rabada, Sai Kishore, Ishant Sharma, Jayant Yadav.

Küm 12 sülen India-i ICC Champions Trophy kokogo



Metsüremi/March 9, 2025
(Agencies): Deobarnü Dubai International Cricket Stadium nung ICC Champions Trophy final nung India-i wicket 4 agi New Zealand kokogo.

Iba asaya nung India captain Rohit Sharma-i run 76 yanglua India team-i wicket trok out sür over 49buba nung run 252 menepba nung teyari tulu agüja liasü.

Rohit-i iba asaya nung ball 83 amenba mapang four 7 aser six asem züka liasü. Pa aser Shubman Gill (31) na senteper over 18.4 nung run 105 yanglu.

Tenati asaya kanga junga tenzüksü saka New Zealand nung bowler temi ball kanga junga ona Gill, Virat Kohli (ball 2 nung run 1) aser Rohit nung run 17 dang yanglur out süja

liasü.

Gill aser Kohli na out asüba sülen Rohit-i Shreyas Iyer (48) den partnership yanglutsü merang saka pa Rachin Ravindra-i ball aonba mapang Tom Latham-i stumped süja liasü.

Iba sülen Iyer-i Axar Patel (29) den senteper run 61 yanglu saka half-century meyangluteti liasü.

Asaya tatemlen kanga toktepba asayaba mapang KL Rahul (34) aser Hardik Pandya (18) nati kanga junga asaya aser tatem nung Ravindra Jadeja (9)-i four ka züka parnoki asaya koka liasü.

New Zealand captain Mitchell Santner-i toss koka mezüng batting amentsü shimba sülen Rachin Ravindra-i ball 29

nung run 37 züka asaya kanga junga tenzüksü.

Asaya nung Varun Chakaravathy-i mezüngbuba Will Young (15) out sütsü aser iba sülen Kuldeep-i Rachin aser Kane Williamson naprongla mapang tatsüka tsüngda out süja liasü.

Iba sülen Daryl Mitchell-i (63) Tom Latham (14) den senteper run 33 aser Phillips den senteper run 57 yanglua liasü.

Mitchell out asüba sülen all-rounder Bracewell-i ball 40 nung dang run 53 yanglu aser New Zealand puri over 50 nung run 250 dak tema yanglua liasü.

India atema Kuldeep aser Chakaravathy nati wicket anana agi aser Mohammed Shami o Ravindra Jadeja natia wicket kaka agia liasü.

BILEMDANGANG

"Tatok agütsüba ya tematiba temeim lir."